



REPUBLIKA E SHQIPËRISË
KËSHILLI I MINISTRAVE

PROJEKT VENDIM

Nr.____, datë _____.____.2025

**PËR MIRATIMIN E RREGULLAVE SPECIFIKE PËR
TRANSFERIMIN OSE DHËNIEN ME QIRA TË TË DREJTAVE TË
PËRDORIMIT TË FREKUENCAVE**

Në mbështetje të nenit 100 të Kushtetutës dhe të pikës 4, të nenit 71, të ligjit nr.54/2024, datë 30.5.2024 “Për komunikimet elektronike në Republikën e Shqipërisë”, me propozimin e Zëvendëskryeministrit dhe ministrit për Infrastrukturën dhe Energjinë, Këshilli i Ministrave,

V E N D O S I:

1. Miratimin e rregullave specifike për transferimin ose dhënien me qira të të drejtave të përdorimit të frekuencave, sipas tekstit që i bashkëlidhet këtij vendimi dhe është pjesë përbërëse e tij.
2. Ngarkohet Autoriteti i Komunikimeve Elektronike dhe Postare për zbatimin e këtij vendimi.

Ky vendim hyn në fuqi pas botimit në “Fletoren Zyrtare”.

KRYEMINISTRI

EDI RAMA

**RREGULLA SPECIFIKE
PËR
TRANSFERIMIN APO DHËNIEN ME QIRA TË TË DREJTAVE
TË PËRDORIMIT TË FREKUENCAVE**

**Neni 1
Qëllimi**

1. Ky dokument përcakton rregullat specifike për transferimin apo dhënie me qira të të drejtave të përdorimit të frekuencave midis subjekteve të autorizuar nga Autoriteti i Komunikimeve Elektronike dhe Postare (AKEP), sipas parashikimeve të ligjit nr. 54/2024, “Për komunikimet elektronike në Republikën e Shqipërisë”.
2. Qëllimi i këtij dokumenti është sigurimi i përdorimit efikas të spektrit të frekuencave, në përputhje me objektivat e politikës përmes një procesi transparent dhe jodiskriminues, në mbrojtje të konkurrencës në treg, interesit publik, sigurisë kombëtare dhe rendit publik.

**Neni 2
Përkufizime**

Përveç përkufizimeve të dhëna në nenin 4, të ligjit nr. 54/2024, “Për komunikimet elektronike në Republikën e Shqipërisë”, për qëllime të këtij dokumenti, termat e mëposhtëm kanë këto kuptime:

- a) “Transferim”, nënkupton kalimin nga një mbajtës i të drejtave të përdorimit të frekuencave (“transferuesi”), të një pjese ose të të gjitha frekuencave radio, të dhëna në përdorim nga AKEP në bazë të një autorizimi individual, tek një palë tjetër (“përfituesi”), ku transferuesi heq dorë nga çdo e drejtë e përdorimit të frekuencave objekt i transferimit.
- b) “Dhënie me qira”, nënkupton dhënie në përdorim nga një mbajtës i të drejtave të përdorimit të frekuencave me autorizim individual (“qiradhënësi”) të një pjese ose të të gjitha frekuencave/të drejtave individuale të përdorimit të frekuencave radio, të dhëna nga AKEP në bazë të një autorizimi individual, tek një palë tjetër (“qiramarrësi”), ku qiradhënësi mbetet përgjegjës për plotësimin e të gjitha kushteve të autorizimit individual, përfshirë pagesën e tarifave, ndërsa qiramarrësi mban përgjegjësinë për kushtet teknike të përdorimit.

- c) “Kushte teknike”, nënkupton kushtet e autorizimit individual me karakter teknik lidhur me kushtet se si mbajtësi i autorizimit individual ruan, zotëron, instalon, mirëmban, përdor dhe operon pajisjet që janë subjekt i autorizimit individual për përdorimin e frekuencave.
- ç) “Procedurë standarde” nënkupton procedurën e shqyrtimit dhe vlerësimit me dy faza nga AKEP të një kërkesë për transferim apo dhënie me qira të të drejtave të përdorimit për autorizimet individuale ku rreziku i shtrembërimit të konkurrencës konsiderohet i lartë.
- d) “Procedurë e thjeshtuar” nënkupton procedurën e shqyrtimit dhe vlerësimit nga AKEP të një kërkesë për transferim apo dhënie me qira të të drejtave të përdorimit të frekuencave ku rreziku i shtrembërimit të konkurrencës konsiderohet i ulët.

Neni 3

Parimet e përgjithshme

1. Transferimi ose dhënia me qira e të drejtave të përdorimit të frekuencave radio bazohet në parimet e ligjshmërisë, objektivitetit, transparencës, mosdiskriminimit dhe konkurrencës së ndershme.
2. Transferimi ose dhënia me qira të të drejtave të përdorimit të frekuencave radio lejohet vetëm me miratimin paraprak të AKEP-it, në përputhje me objektivat e përgjithshme politike të përcaktuara në nenin 5, të ligjit Nr. 54/2024, “Për komunikimet elektronike në Republikën e Shqipërisë” (këtu e më poshtë ligji nr.54/2024), si dhe objektivat e politikës spektrale.
3. Transferimi ose dhënia me qira e të drejtave të përdorimit të frekuencave radio synojnë përdorimin sa më efikas dhe racional të spektrit, duke nxitur konkurrencën dhe zhvillimin e qëndrueshëm të tregut të komunikimeve elektronike.

Neni 4

Kërkesat për transferimin ose dhënien me qira të frekuencave

1. E drejta e transferimit ose dhënies me qira e të drejtave të përdorimit të frekuencave, bëhet me iniciativën e mbajtësit të tyre, sipas përcaktimeve në nenin 71 të ligjit nr. 54/2024.
2. Përjashtohet nga procedura e transferimit ose e dhënies me qira në përdorim të frekuencave radio në rastet kur e drejta e përdorimit është dhënë fillimisht pa pagesë, për të drejtat e lidhura me transmetimet radiotelevizive, për

stacionet radio në avion/ anije, radioamatorët, si dhe Autorizim individual për nevoja eksperimentale.

3. AKEP miraton transferimin ose dhënien me qira të të drejtave të përdorimit, sipas këtyre rregullave, kur përmbushen kërkesat për transferim sipas pikës 5, të nenit 71, të ligjit nr. 54/2024.
4. AKEP refuzon transferimin ose dhënien me qira të të drejtave të përdorimit kur:
 - a) marrëveshja e transferimit ose dhënies me qira bie ndesh me rregullat e konkurrencës;
 - b) transferimi apo dhënia me qira ndikon negativisht në funksionimin e rrjeteve ekzistuese të komunikimeve elektronike;
 - c) transferimi apo dhënia me qira cënon menaxhimin efikas të spektrit;
 - ç) preken interesat publike, siguria kombëtare, rendi publik ose shëndeti publik;
 - d) kur në autorizimin individual është përcaktuar që të drejtat e përdorimit nuk janë të transferueshme.
 - e) ka dyshime të arsyeshme se subjekti që kërkon transferimin apo marrjen me qira të të drejtave të përdorimit nuk i përmbush kërkesat për përdorimin e tyre.
5. AKEP-i me njoftimin fillestar për synimin e një transferimi apo dhënie me qira të të drejtës së përdorimit nga mbajtësi i tyre, ndërhyr për të parandaluar:
 - a) përqendrimet të tepërta të spektrit tek një sipërmarrës ose grupi të lidhur ekonomikisht;
 - b) krijimin apo forcimin e pozitive dominuese të një sipërmarrësi;
 - c) pengimin e hyrjes së operatorëve të rinj në treg.
6. Të gjitha kushtet teknike, detyrimet dhe kufizimet e parashikuara në autorizimin individual fillestar mbeten të vlefshme dhe detyruese edhe pas kryerjes së transferimit apo dhënies me qira të të drejtave të përdorimit të frekuencave.
7. Transferimi i së drejtës nuk nënkupton automatikisht transferimin e detyrimeve që lidhen me autorizimin individual. Përcaktimi i detyrimeve bëhet nga AKEP në vendimin e miratimit.

Neni 5

Aplikimi për transferim ose dhënie me qira

1. Aplikimi për miratimin e transferimit ose dhënies me qira të të drejtave të përdorimit bëhet pranë AKEP bashkërisht nga palët e interesuara, sipas

formularëve të miratuar nga AKEP për transferimin ose dhënien me qira të të drejtave të përdorimit të frekuencave.

2. Aplikimi për transferimin ose dhënien me qira të të drejtave të përdorimit të frekuencave kalon në këto faza:
 - a) njoftimi fillestar për synimin e një transferimi apo dhënie me qira;
 - b) njoftimi zyrtar;
 - c) verifikimi paraprak dhe vlerësimi nga AKEP;
 - ç) vendimi i AKEP.
3. AKEP miraton formularët e aplikimit për njoftimin zyrtar të transferimit ose dhënien me qira për procedurën standarde dhe procedurën e thjeshtuar.

Neni 6

Njoftimi fillestar

1. Palët që synojnë të realizojnë një transferim apo dhënie me qira të të drejtave të përdorimit të frekuencave njoftojnë fillimisht AKEP-in përmes një njoftimi fillestar.
2. Njoftimi fillestar përmban një informacion të përgjithshëm mbi synimin për transferimin apo dhënien me qira të të drejtave të përdorimit të dhëna sipas autorizimit individual të referuar në njoftimin fillestar të paraqitur nga mbajtësi i të drejtës së përdorimit ose bashkërisht nga palët e interesuara.
3. Me marrjen e njoftimit fillestar për synimin e një transferimi apo dhënie me qira të të drejtave të përdorimit, AKEP shqyrton brenda 10 (dhjetë) ditëve pune nëse transferimi i të drejtave të përdorimit të frekuencave është i lejuar dhe i kthen përgjigje palëve të interesuara duke informuar kërkesat për vijimin ose jo të transferimit ose dhënies me qira, sipas përcaktimeve ligjore.
4. Gjatë shqyrtimit të njoftimit fillestar AKEP mund të kërkojë sqarime shtesë lidhur me kërkesat përkatëse të autorizimit individual për të cilin synohet transferimi apo dhënia me qira të të drejtave të përdorimit të frekuencave të propozuar.
5. Në rastin kur transferimit apo dhënia me qira e të drejtës së përdorimit, është e lejuar, AKEP kthen përgjigje dhe udhëzon për procedurën që zbatohet në këtë rast, procedurë të thjeshtuar ose standarde dhe gjithashtu për dokumentat që duhet të paraqiten me njoftimin zyrtar.
6. Në dhënien e përgjigjes për njoftimin fillestar AKEP mban parasysh parashikimet e nenit 4, të kësaj rregullore për rastet e refuzimit të transferimit ose dhënies me qira të të drejtave të përdorimit. Në rastin kur transferimi ose dhënia me qira nuk lejohet, AKEP kthen përgjigje duke arsyetuar refuzimin e kësaj të drejte.

Neni 7

Njoftimi zyrtar

1. Me marrjen e përgjigjes nga AKEP për lejimin e transferimit apo dhënies me qira të të drejtave të përdorimit sipas nenit 6, të këtij dokumenti, palët e interesuara kanë të drejtë të paraqesin në AKEP një njoftim zyrtar për transferimin ose dhënien me qera.
2. Njoftimi zyrtar bëhet i përbashkët dhe përmban informacionin si më poshtë:
 - a) të dhënat e plota identifikuese të palëve;
 - b) të dhënat për autorizimit individual dhe brezin e frekuencës objekt të marrëveshjes;
 - c) zonën gjeografike të shërbimit dhe kapacitetet teknike të përfshira;
 - ç) afatin kohor të marrëveshjes dhe natyrën e saj (transferim apo qira);
 - d) përshkrimin e kushteve kontraktuale, duke përfshirë përgjegjësitë teknike, dhe financiare;
 - dh) deklaratën mbi ndikimin e pritshëm në treg dhe përdorimin e spektrit;
 - e) datën e parashikuar të hyrjes në fuqi të marrëveshjes;
 - ë) deklaratën për përmbushjen e kushteve të autorizimit.
3. Palët njoftuese në njoftimin zyrtar të paraqitur në AKEP, specifikojnë nëse njoftimi përmban ose jo informacion konfidencial, duke dhënë arsyetimin e duhur kur kërkohet konfidencialiteti dhe ruajtja e sekretit tregtar. Në rast dyshimi për konfidencialitetin e informacionit, AKEP-i merr vendim për ruajtjen e konfidencialitetit pasi të ketë dëgjuar dhe vlerësuar interesat e sipërmarrësit që zotëron informacionin.

Neni 8

Verifikimi paraprak i Njoftimit Zyrtar

1. Me marrjen e njoftimit zyrtar AKEP bën verifikimin paraprak të aplikimit brenda 5 (pesë) ditëve pune për të përcaktuar nëse kjo kërkesë kalon në fazën e vlerësimit. Në veçanti, por pa u kufizuar, AKEP verifikon:
 - a) nëse janë dhënë të gjitha informacionet e kërkuara;
 - b) që palët njoftuese kanë një autorizim individual;
 - c) nëse është një transferim apo dhënie me qira të të drejtave të përdorimit të frekuencave që zbatohet sipas kësaj rregulloreje;
 - ç) që përdorimi i propozuar përputhet me qëllimin/shërbimet e lejuara në një regjim të caktuar autorizimi individual ose me autorizimin e

përgjithshëm për ofrimin e rrjeteve ose shërbimeve të komunikimeve elektronike sipas ligjit nr. 54/2024;

- d) që të gjitha pagesat, tarifat e radiokomunikacionit për autorizimin individual në lidhje me të drejtat e veçanta të përdorimit janë paguar dhe janë të përditësuar;
 - dh) që nuk ka njoftim(e) apo vendime në lidhje me revokimin e autorizimit individual që i nënshtrohet transferimi apo dhënia me qira të të drejtave të përdorimit të frekuencave.
2. AKEP kontrollon gjithashtu që çdo kërkesë për konfidencialitet të trajtohet dhe zgjidhet në përputhje me legjislacionin në fuqi për ruajtjen e sekretit tregtar.
 3. AKEP kërkon sqarime ose dokumente shtesë nëse informacioni është i paplotë.
 4. AKEP ka të drejtë ta refuzojë shqyrtimin deri në plotësimin e të gjitha kërkesave.
 5. Nëse në përfundim të verifikimit paraprak AKEP konstaton që njoftimi është i plotë dhe në përputhje me kërkesat për lejimin e transferimit ose dhënien me qira, njofton palët për fillimin e procesit të vlerësimit.

Neni 9

Procedura e vlerësimit

1. AKEP kryen procesin e vlerësimit të aplikimit me dy faza si më poshtë:
 - a) vlerësimi i Fazës së parë;
 - b) vlerësimi i Thelluar.
2. Vlerësimi i fazës së parë fillon pas njoftimit të AKEP sipas pikës 5, të nenit 8, të këtij vendimi. Data e njoftimit përcakton dhe datën e fillimit të vlerësimit të fazës së parë. AKEP kryen vlerësimin sipas fazës së parë brenda 30 (tridhjetë) ditëve nga marrja e njoftimit zyrtar.
3. Vlerësimi i fazës së parë kryhet për të gjitha aplikimet si për procedurën standarde dhe atë të thjeshtuar.
4. Vlerësimi i thelluar fillon në përfundim të vlerësimit të fazës së parë.
5. Gjatë fazës së parë të vlerësimit, AKEP pasi ka shqyrtuar informacionin e dhënë për transferimin apo dhënien me qira të të drejtave të përdorimit të frekuencave bën vlerësimin bazuar si më poshtë:
 - a) mbi analizën nëse nga procesi do të rezultonte një shtrembërim i konkurrencës në treg për rrjetet ekzistuese dhe të reja;
 - b) mbi analizën e paraqitjes së një rreziku të qartë që mbajtësi i ri nuk është në gjendje të përmbushë kushtet fillestare për të drejtën e përdorimit;

- c) mbi përputhshmërinë me kërkesat ligjore;
- ç) mbi kriterin ekonomik e konkurrues për të identifikuar nëse marrëveshja krijon pozita dominuese apo kufizon hyrjen në treg;
- d) mbi kriterin që përdorimi i spektrit do të mbetet në përputhje me rregulloret ekzistuese;
 - dh) mbi kriterin ligjor të përputhshmërisë me detyrimet e autorizimit individual dhe me ligjin për komunikimet elektronike;
 - e) mbi vlerësimin nëse transaksioni krijon përqëndrim të tepërt të spektrit në një operator të vetëm;
 - ë) mbi kontrollin e përputhjes ligjore dhe administrative;
 - f) mbi analizën e ndikimit në cilësinë e shërbimit dhe në konsumatorët përfundimtarë.
- 6. Nëse në përfundim të vlerësimit të Fazës së parë, AKEP arrin në konkluzionin që nuk ka rreziqe për shtrembërimin e konkurrencës ose nuk ka rrezik për mospërmblidhje të kushteve fillestare të autorizimit individual, AKEP merr vendimin për miratimin e aplikimit sipas nenit 10 të këtij dokumenti.
- 7. AKEP ka të drejtë të vazhdojë me kryerjen e vlerësimit të thelluar, në rastet si më poshtë:
 - a) kur vlerëson se transferimi ose dhënia me qira e të drejtave të përdorimit të frekuencave të propozuar mund të çojë në shtrembërim të konkurrencës;
 - b) kur ka dyshime që përfituesi nuk është në gjendje të përmbushë në mënyrë të qëndrueshme kushtet origjinale të autorizimit individual.
- 8. AKEP kryen vlerësimin e thelluar brenda 90 (nëntëdhjetë) ditëve nga fillimi i kësaj faze.
- 9. AKEP publikon në faqen e tij të internetit vendimin pën kryerjen e vlerësimit të Thelluar në fazën e dytë. AKEP gjithashtu njofton me shkrim palët njoftuese në lidhje me vendimin për të kryer një vlerësim të thelluar për aplikimin.
- 10. Palët njoftuese dhe çdo palë tjetër e interesuar ka të drejtë të paraqesë opinionin me shkrim jo më vonë se 30 (tridhjetë) ditëve nga data e publikimit të një njoftimi për të kryer një vlerësim të thelluar. AKEP shqyrton të gjitha parashtrimet e bëra brenda afatit të caktuar.
- 11. AKEP mund të kërkojë informacione të mëtejshme nga palët njoftuese për të ndihmuar në procesin e vlerësimit të thelluar.
- 12. Gjatë vlerësimit të Thelluar AKEP sipas parashikimeve në pikën 4, të nenit 72 të ligjit nr. 54/2024, merr mendimin e Autoritetit të Konkurrencës në lidhje me rrezikun e dominancës dhe shtrembërimit të konkurrencës në treg.

13. AKEP-i merr mendimin e ministrit në rastin e ndryshimeve të rëndësishme të lidhura me transferimin ose dhënien me qira të të drejtave të përdorimit të frekuencave, të dhëna me konkurim, të cilat ndikojnë në përmbushjen e objektivave strategjike, sipas nenit 5 të ligjit nr. 54/2024.
14. Në përfundim të vlerësimit të thelluar, dhe pas marrjes të mendimit të Autoritetit të Konkurrencës dhe sipas rastit dhe të ministrit, AKEP merr vendim për miratimin ose refuzimin e aplikimit.
15. Vendimi i arsyetuar i AKEP, i njoftohet palëve sipas legjislacionit në fuqi dhe publikohet në faqen e internetit të AKEP.

Neni 10

Miratimi i transferimit ose dhënies me qira

1. Në përfundim të procesit të vlerësimit AKEP merr vendimin për:
 - a) miratimin e transferimit ose dhënies me qira pa kushte;
 - b) miratimin e transferimit ose dhënies me qira me kushte specifike;
 - c) refuzimin e arsyetuar të vendimit.
2. Vendimi përfundimtar i AKEP në lidhje me transferimin ose dhënien me qira të të drejtave të përdorimit të frekuencave përfshin një përmbledhje të informacionit, provave dhe parashtrimeve të shqyrtuara nga AKEP dhe arsye të mbështesin atë vendim.
3. Me miratimin e transferimit ose dhënies me qira, AKEP lëshon autorizimin e ri individual ku përcakton kushtet specifike për kërkesat teknike, të mbulimit, kohëzgjatjen e autorizimit, ose dhënies me qira, detyrimet e transferuesit dhe përfituesit si dhe detyrimet e tjera sipas parashikimeve në ligjin nr. 54/2024 për përdorimin e frekuencave.

Neni 11

Rregjistrimi i transferimit

AKEP mban regjistër të vecantë për autorizimet individuale dhe me miratimin e transferimi ose dhënies me qira, të të drejtave të përdorimit të frekuencave, publikon transferimet ose dhëniet me qira të miratura në faqen e vet të internetit.

Neni 12

Mbikëqyrja dhe raportimi

1. AKEP ushtron mbikëqyrje të vazhdueshme mbi përdorimin e spektrit të transferuar ose të dhënë me qira, për të siguruar pajtueshmërinë me kushtet e autorizimit dhe vendimin e miratimit për kushtet specifike.
2. Sipërmarrësit janë të detyruar të paraqesin pranë Autoritetit të Komunikimeve Elektronike dhe Postare raporte periodike vjetore mbi përdorimin e frekuencave dhe efektet e marrëveshjeve në treg, si dhe në zbatim të ligjit nr. 54/2024.
3. Në rast të mos respektimit të kushteve AKEP merr masat administrative sipas parashikimeve në ligjin Nr. 54/2024, “Për komunikimet elektronike në Republikën e Shqipërisë”.